



KENYATAAN MEDIA

HARI KONSERVASI EKOSISTEM HUTAN PAYA LAUT ANTARABANGSA TAHUN 2025

Hari Konservasi Ekosistem Hutan Paya Laut Antarabangsa yang disambut pada 26 Julai setiap tahun merupakan manifestasi komitmen global dalam memperingati peranan signifikan hutan paya laut dan ekosistem pesisiran pantai kepada keseimbangan alam dan kesejahteraan manusia. Tarikh ini telah diisytiharkan semasa Sesi Ke-38 Persidangan UNESCO pada 6 November 2015 di Paris.

Tema sambutan tahun ini, **“Ekosistem Hutan Paya Laut dan Komuniti”**, amat bertepatan dengan pendekatan negara yang menekankan keseimbangan antara kelestarian alam dan kesejahteraan sosioekonomi masyarakat. Tema ini mengangkat kesedaran mengenai hubungan erat antara perlindungan alam semula jadi, khususnya hutan paya laut, dengan kesejahteraan komuniti yang bergantung kepada sumber ini untuk kehidupan dan mata pencarian.

Kerajaan melalui **Kementerian Sumber Asli dan Kelestarian Alam (NRES)** kekal teguh dalam memperkukuh agenda pemeliharaan dan pemuliharaan alam sekitar. Antara inisiatif utama ialah pelaksanaan **Program Penanaman Pokok Bakau dan Spesis-Spesis yang Sesuai di Pesisiran Pantai Negara**, melibatkan penanaman semula seluas **3,820 hektar** kawasan terancam dengan **8.99 juta pokok**.

Usaha konservasi ini turut diperkukuh dengan kerjasama erat bersama **13 pertubuhan bukan kerajaan (NGO)** dan komuniti tempatan melalui inisiatif memulih kawasan terjejas, melindungi pesisir pantai dan menyemai budaya cinta alam sekitar dalam kalangan masyarakat. Pendekatan bersepadu ini selaras dengan usaha negara menghadapi cabaran perubahan iklim, kemerosotan biodiversiti dan ancaman hakisan pantai.

Kami ingin menyeru semua pihak agensi kerajaan, sektor swasta, NGO, akademik dan seluruh rakyat Malaysia untuk bersama menggalas tanggungjawab memelihara khazanah hutan paya laut negara. Komitmen kolektif ini amat penting bagi memastikan kelangsungan sumber semula jadi ini untuk kegunaan masa kini dan generasi akan datang, selaras dengan aspirasi pembangunan lestari negara.

Selamat Menyambut Hari Konservasi Ekosistem Hutan Paya Laut Antarabangsa 2025.

**KEMENTERIAN SUMBER ASLI DAN KELESTARIAN ALAM
26 JULAI 2025**



Unit Komunikasi Korporat | Kementerian Sumber Asli dan Kelestarian Alam (NRES)
Tel. : 03-8000 8000 | Faks : 03-8889 4763



nresmalaysia